

Tajuk : UNIMAS Nerima 3969 Pelajar Baru Nyerumba Hari Merdeka.

UNIMAS nerima 3969 pelajar baru nyerumba Hari Merdeka

ALVESTER BIGOL SULANG

KUCHING : Pengerami ngintu ulang taun ke-50 Sarawak merdeka dalam Malaysia ba taun tu chukup besai reti ngagai Universiti Malaysia Sarawak (UNIMAS) laban bisi 3969 iku pelajar baru masuk UNIMAS beserimbai enggau 'Minggu Aluan Pelajar (MAP) Ambilan September Sesi 2013/2014'.

Nitihka penerang berita ke dianjung ngagai Utusan Sarawak kemari madahka, taun tu UNIMAS nempa sejarah ke diri empu laban Penulung Chanselor iya Prof Dato' Dr Mohamad Kadim Suaidi empu nurun ngagai Palan Penyangkai Bilun Entarabansa Kuching ngambat penatai bala pelajar baru.

Bela bisi enggau ngambat penatai bala pelajar baru tu iya nya Sapit Penulung Chanselor (Akademik

enggau Entarabansa), Prof Dr Fatimah Abang, Sapit Penulung Chanselor (Pemansik enggau Inovasi) Prof Dr Peter Songan, Sapit Penulung Chanselor (Pekara Pelajar enggau Alumni) Prof Mohd Fadzil Abdul Rahman, sereta bala raban komiti besai pengatur pengawa UNIMAS.

Minggu ngelaluka penatai pelajar tauka (MAP) ungkup bulan September taun 2013/2014 deka diatur pengelama seminggu iya nya berengkah ba hari keterubah pelajar ngerijista diri kena 1 enggau 2 September 2013.

Bisi 3969 iku pelajar udah ngerijista diri nyadi pelajar baru UNIMAS iya nya 1244 pelajar siswa (lelaki) enggau 2725 siswi (indu). Ari penyampau nya 2014 iku pelajar (Melayu), 842 pelajar (China), 317 pelajar (Iban), 161 pelajar (India), 119 pelajar (Bidayuh) enggau 516

pelajar (bansa bucai).

Nangkan ke nya, 65 iku pelajar entarabansa iya nya 38 siswa enggau 27 siswi bela udah ngerijista diri lalu tebal agi sida tu datai ari menua China, Indonesia, Kyrgyz Republic, Pakistan, Turki, Bangladesh enggau Myanmar.

Pelajar ke diambi sekali tu ari mayuh bengkah bidang program ari fakulti nitihka rantai tu ; - Fakulti Sains Kognitif enggau Pemansang Mensia (FSKPM) – 617 pelajar; - Fakulti Sains Komputer enggau Teknologi Pemadah (FSKTM) – 330 pelajar; - Fakulti Ekonomi enggau Pengawa Dagang (FEP) – 552 pelajar; - Fakulti Sains enggau Teknologi Sumber (FSTS) – 621 pelajar; - Fakulti Sains Sosial (FSS) – 698 pelajar; - Fakulti Seni Gunaan enggau Kreatif (FSGK) – 623 pelajar; - Fakulti Pengawa Berubat enggau Sains Pengerai (FPSK) – 166 pel-

jar; enggau -Fakulti Injinir (FK) – 362 pelajar.

Setipak enggau juluk program MAP ke daitur UNIMAS, dikena meri peneleba ngagai bala pelajar baru renggat 2013/2014 belajarka penemu bekaul enggau daya idup nyadi siswa-siswi ba kampus.

Bala pelajar baru diasuh diau ba palan endur bemalam ke diberi nama :-Kolej Allamanda; -Kolej Bunga Raya; -Kolej Cempaka; -Kolej Tun Ahmad Zaidi; enggau Kolej Sakura.

Berebak enggau nya mega mayuh program bucai ke bisi diatur sepe-manjai MAP baka :-Majlis Ikrar Pelajar (MIP) kena 6 September 2013 (Hari Lima), pukul 8.15 pagi, - Malam Kesarjanaan Mahasiswa (MKM) kena 6 September 2013 (Hari Lima), pukul 8.30 malam enggau Malam Rumpun Budaya (MRB) kena 7 September 2013 (Hari Enam), pukul 8.30 malam.



SELAMAT DATAI...Penulung Chanselor UNIMAS Prof Dato' Dr Mohamad Kadim Suaidi (dua kanan) benung berandau enggau apai pelajar ke bisi nganjung anak diri ba Palan Penyangkai Bilun Entarabansa Kuching pagi kemari (Hari Minggu).